

# RAPIITEERO PABLO ROJANKINATZINIRI TIMOTEO

---

## Wethataantsi

**1** <sup>1</sup>Naaka Pablo jankinatzimiro iroka. Rotyaantaa-rewoye Jesús Jeepatzii-totaa-rewo, tema riitaki Tajorentsi kowakaa-kinawori nokenkithata-koteero ikashiya-kaakaeri rañaakaa-yitee Jeepatzii-totaa-rewo Jesú. <sup>2</sup>Eeroka nojankinatzini Timoteo, eeroka nokimita-kaanta netakotani notyomi. Okantashitzimaetyaa ineshironkateemi Ashiteeri Tajorentsi eejatzi Awinkatharite Jesú Jeepatzii-totaa-rewo, okantashitzimaetyaa retakotemi, piñeero pijeeki kameetha.

## Pikenkithata-koteeri Jeepatzii-totaa-rewo

<sup>3</sup>Ari nokanta-piintatyaa tsireniriki eejatzi kitejeriki namanakoyitzimi, nopasoonkitziri Tajorentsi, nantawaetenir. Noshiyakoteeyaari ikimi-yitaka nowae-jatziteni tampatzika-shireri-paeni rirori. <sup>4</sup>Aririka noshiretyaawo piraawaetaka paerani, osheki nokowaki napiiteero noñeemi, ari okantyaa nokimo-shiretan-tyaari. <sup>5</sup>Osheki nokenkishiryaa-kotakimi jempe okanta pikemijanta-perotan-tanakari. Tema rootaki etanakawo pijawo Loida, opoñaashita piniro Eunice. Niyotzi eejatzi ari pikimita-nakari eeroka. <sup>6</sup>Rootaki napiitan-tzimiri nokantemi: Powakirateero itajonka-wentakimi Tajorentsi noteya-patzii-totan-takimiro paerani nako, pikimita-kaanteero rojejetziro paamari tsiwaki-matatsiri. <sup>7</sup>Tema tee ithaawa-shireta-kaantzi Tajorentsi. Apatziro raawayaa-shireta-kaantzi, retakoshiretakaanta, iñaako-shireta-kaanta.

<sup>8</sup>Rootaki eero pikaani-wenta-kaantawo pikenkithata-koteri Awinkatharite, ari pikimiteenari naaka, eero pikaani-wentana romonkyaa-wentee-tanari Tajorentsi. Tema riitaki aawyaa-shireta-kaemini, poshiya-kotan-tenari naaka, nokemaatsita-kowentawo Kameethari Ņaantsi. <sup>9</sup>Rijatzi owawijaako-shire-yiteeri Tajorentsi, riitaki

kaema-shire-yiteeri akite-shiretan-taari. Teera aaka matashityaawoni, tema riitaki kowaentsi rantero. Ashi royo paerani Tajorentsi ikowa-piintaki ineshironka-yitee Jeepatzii-totaa-rewo Jesús.<sup>10</sup> Rootaki imatakiri nimaeka, ikoñaataki paerani Owawijaa-kotan-taniri, Jeepatzii-totaa-rewo Jesús. Riitaki matakirori rotsinampaero kaamanitaantsi, ramayita-kaero Kameethari Ñaantsi, roo ayotantaari ashí owaero rañaakaa-yitee.<sup>11</sup> Rootaki ryoshiitan-takinari naaka Otyaantaa-rewo-paeni, riitaki otyaantakina nokenkithata-kaanteero Kameethari Ñaantsi, eejatzi niyotaa-yiteeri kaari nosheninkata.<sup>12</sup> Rootaki nokemaatsi-waetan-tawori nimaeka, roo kanteencha temaeta nokaani-wentia. Tema niyotzi naaka iita nawentaari, niyoperotzi otzimi-motziri ishintsinka, ari okantyaa eero roka-kaantanawo ikowakaa-kinari nanteeniri roojatzi aririka omonkaateeyaa kitejeri ipiyantee-yaari.<sup>13</sup> Ari pikimita-neeyaari eeroka, poshiyako-tenawo jempe okanta pikemakina niyotaantaki, piyata-kaero pawentee-yaari Jeepatzii-totaa-rewo Jesús, etakoyiteeri, ashiyiteeri eejatzi.<sup>14</sup> Ari ojeeka-shiretan-takimi Ishire Tajorentsi, riitaki kyaaryoo-shireta-kaemini eero pokantawo kyaariperori otzimi ikowakaa-kimiri piyotaan-teero.

<sup>15</sup> Pikema-kotakina eeroka rooka-wenta-waeta-nakina nampiyitawori Asia-ki. Irika Figelo eejatzi Hermóhenes.<sup>16</sup> Roo kanteencha irika Onesíforo, osheki roemoshirenka-piintakina rirori, tee ikaaniwenta-kotyaana roojowitee-takina. Osheki nokowaki ineshironkateeri Tajorentsi ikaatzi jeeka-wankotziriri.<sup>17</sup> Tema riitaki aminaminata-paakinari rareetakah Roma-ki, roojatzi iñaanta-paakinari.<sup>18</sup> Riira Awinkatharite neshironkateerini paata oweyaantyaawoni kitejeri ipiyeerika. Tema piyotzi eeroka, osheki ramitakotakina Onesíforo nojeekan-takari Efeso-ki.

### Pikimita-kaantyaa eerokami rowayirite Jesús Jeepatzii-totaa-rewo

**2** <sup>1</sup> Notyomi, tema riitaki neshironkateemiri Jeepatzii-totaa-rewo Jesús, okantashitzimaetyaa raawayaa-shireta-kaemi. <sup>2</sup> Tema pikemakina jempe okanta niyotaantaki atziripaeniki. Otzimathee piyoshiyite nimaeka ameentaa-rewo riitaki mataneeroni Riyotaa-neeri eejatzi itsipa-paeni.<sup>3</sup> Pamaakowentyaa piñaa-shintsita-kowenta-neeyaari Jesús Jeepatzii-totaa-rewo. Pikimita-kaantyaa eerokami rowayirite.<sup>4</sup> Tema apaani owayirita-chari tee iñeetziri rantaneero antawae-rentsi rantayita-piintee-tziri. Tema otzimathee retapaentyaaawo ikantakiriri reewarite.<sup>5</sup> Kantacha eejatzi pikimita-kotyaari ipinatee-tziri oyishiteen-tsiri ishiyeyani. Tema antawo iñaashintsitakawo. Roo kanteencha imatantyaawori royiishitante otzimathee retanakyaaawo iñaanta-piintyaawo. Rooma ramataa-shiwaetyaa-rika ikoyi royiishitante, eerowa ipinatee-tziri.<sup>6</sup> Kantacha eejatzi pikimita-kotyaari ikanta apaani pankiwae-rintzi. Tema riitaki etapiintawo rowayitawo okithoki iwankiri.

<sup>7</sup>Otzimatyee pikenkishiryaa-kotero nokanta-yitakimiri. Tema riitaki Awinkatharite kemathatakaa-perote-mironi maawoeni.

<sup>8</sup>Pikenkishiryaa-koteri Jesús Jeepatzii-totaa-rewo icharinitakari pinkatharini David. Añahae rirori ikamawitakaha. Rootakira iroka Kameethari Ñaantsi nokenkithata-koteeri. <sup>9</sup>Rootaki natsipeta-kowentari noñaantawori nimaeka roojowaeteetana, romonkyaa-waeteetana, ikimitakaantee-takina naakami owantzinkari. Rooma iñaani Tajorentsi eero imateetziro roojoteetero roori. <sup>10</sup>Rootaki namawetan-tawori nimaeka maawoeni nokemaatsi-waetakari, okantakaan-tziro netakotari ikaatzi ryoshiiteeri Jeepatzii-totaa-rewo Jesús rowawijaako-shire-yiteeri. Ari okantyaa ashi rowantee-yaawori rañaayitee. <sup>11</sup>Iroka maperori ikantee-tziri:

Aririka akama-koteeri Jeepatzii-totaa-rewo, aritaki atsipatee-yaari rañaakaa-yitee.

<sup>12</sup>Aririka amawe-waenitaki, ari atsipatee-yaari apinkathari-wentantee. Rooma aririka akante: “Tee noñeeri.” Aritaki imatee ejatzti aaka.

<sup>13</sup>Okantawitaka tee añaawitawo oetziñaarikowentyaari, riima rirori roetzinäariko-wenta-yitee.

Tema ashi rowaero rirori, tee ithañaa-pithatantawo okaatzi ikashiya-kaantziri.

### Pikimtyaari antawae-ryaantzi raakameethee-tziri

<sup>14</sup>Piyotaan-teero iroka. Pishintsi-tantero ikowakaanta-perotziri Tajorentsi: Eero iñaanata-wakaa-wenta-shiteetawo ñaantsi-paeni kaari rooperota-tsini. Tema kantacha owarishireteri ikaate kemironi.

<sup>15</sup>Otzimatyee piñaashintsieeyaa pitampatzikateero ñaantsi kyaariperori, ari okantyaa raakameetha-wentan-tee-mirori Tajorentsi. Pikimtyaari antawae-ryaantzi kaari tzimatsini oetyaa ikaaniwenta-kotyaari.

<sup>16</sup>Eero pikemijanta-waetziro eeroka iñaawaetashitee-tari ñaantsi kaaripero-yitatsiri. Arira opoñaari itheenka-tajorentsitan-teetzi.

<sup>17</sup>Okimiwitakawo owawathatanta apathaa-waeterika. Rootaki awiji-mota-kiriri Himeneo ejatzti Fileto. <sup>18</sup>Ikinakaa-shiwaetakawo rirori ryotaan-tziro kyaariperori, ikantaki: “Teera kyaaripero añaayitee aririka akamayitaki, tema añaayiteero roshiya-kaawentee-takiri ‘añaaamentotsi.’” Iroka okaatzi ryotaan-tawitakari rowari-shiryaan-takari ikaateeyini ikemijanta-witanaa. <sup>19</sup>Roo kanteencha, okimiwitakawo rowatzika-tyeemi Tajorentsi roo-perori itzinkami, ari rowetsikakimi ipango. opoñaashitya ipataka-kotaki apite jankina-rentsi ikanteetzi: “Riyotziri Awinkatharite ikaatzi rashitari.” Ejatzti: “Ikaate awentahae-yaarini Jeepatzii-totaa-rewo, otzimatyee rookaero kaariperota-tsiri.”<sup>a</sup>

<sup>a</sup> 2.19 awentahae-yaarini = waerontsi

<sup>20</sup> Jame oshiyakaawen-tawakiro okaatzi tzimatsiri ipankoki apaani ashaahantzinkari. Tema eenitatsi owaneenka-yitachari chomopaeni, poreryaanakitsiri, osheki ineshironatziro. Roo kanteencha eeniyitatsi incha-naki eejatzi chomo, tee ineshironka-pero-tziro irokapaeni. <sup>21</sup> Aririka akite-shire-yitanee, ari ikimi-yitee-yaawo chomo ineshironkatziro ashitawori, ikowa-piintzi rowanta-yityaawo. Ari ikiteshiretakaanee Ashiteeri, aamakowentyaa antayiteeniri kameethayitatsiri. <sup>22</sup> Inteena powayiteero ikowa-shiwaetari ewankari-paeni, poshiya-kaantero pishiya-pithata-tyeeromi. Tema rootaki piñaamata-piinta-nakyaaari pikameetha-shire-yitee, pikyaaryoo-wentyyaa, petakotantya, kameetha pijeka-kaantayite, pitsipa-yitee-yaari kiteshirer ikaatzi awentaa-yitaariri Awinkatharite. <sup>23</sup> Eero piñaawae-yitziro ñaantsi kaari kameethatatsi, tema rootaki opoñaantari ikija-wakaan-teetari. <sup>24</sup> Rooma aakapaeni rompera-yiteera Tajorentsi, tee okameethatzi añaana-minthata-wakaeyaa aakapaeni. Tema otzimatyyee aneshinonkatawakaeyaa, akiyothanite ayotaantee, atsinampa-shirete, <sup>25</sup> eentsikiroeni akantawentyaaari akaminaa-yiteri kijaneenteeri, aama aritaki ipiya-shireta-kaeri Tajorentsi, aritaki riyota-koteero kyaariperori. <sup>26</sup> Ari okantyaa riyotan-teeyaari ishirika-kityaa riwiriki Kamaari, tema riitaki omperawaeta-piinta-kariri, ishintsiwentziri rantayiteniri ikowashi-yitari rirori.

### Jempe ikanteetyaa ijekaetee paata iweyaanta-paakyawoni kitejeri

**3** <sup>1</sup> Otzimatyyee piyote, paata oweyaanta-paakyawoni kitejeri antawo opomeentsitzi-moyitee. <sup>2</sup> Iroka ikantayityaa atziri-paeni: Apaniroeni ineshironka-pero-waetyaa, iñaawenawaetashityaa roshekiro rashaahawo, rajahaa-wenta-waetyaa, eero ipinkathatantzi, itheenka-tajorentsi-waete, ipiyatha-waetyaaari ashitariri, eero riyoteero ipasoonkitante, ikaweyan-tawaete, <sup>3</sup> eero retakotantaa, eero ikowa-piintee ipeyakotante, itheeyaa-kotan-tawaetyaa, eero romaanta-kaawo ikowa-shiwaetari, osheki rowatsinaan-tawaetee, ikijaneentero kameetha-yitatsiri, <sup>4</sup> pithokashitan-tanir irikapaeni, eero iñaakonita, osheki ikantakaa-pero-waetyaa, osheki iñaamawaetyaawo ikowashi-yitari awijanakiro ikowakaa-witariri Tajorentsi, <sup>5</sup> ari roshiya-kowaeta-kyarimi pinkatha-tajorentsi-waetaniri, roo kanteencha osheki itheenki otzimi-motziri Tajorentsi ishintsinka. Eerowa pitsipa-yitari eeroka. <sup>6</sup> Tema imatakiro irika-paeni ijeka-wankotantaki, ramatawi-yitakiro tsinani-paeni shipeta-shireri, antawo ikenkishiryaa-kaayitawo okaapiro-shirete, otzimatyyee awentee-yaari irika-paeni, rootaki opoñaan-tyaari oñaama-shirewaeta-nakyaa roori. <sup>7</sup> Rootaki okowa-perotan-tanakyaari iyoperotero, roo kanteencha tee iyotakoperotzimaetawo okaatzi rooperota-tsiri. <sup>8</sup> Rootaki imatakiri paerani sheripiyari Janes eejatzi Jambres, ikoshekakari Moisés, ari

ikimitari irika atziri-paeni amatawitan-taniri, tee ookimo-shiretari okaatzi rooperota-tsiri. Kaari-pero-shireri irika, raminaa-shiwaetaka okaatzi ikemijanta-yiwitakari.<sup>b</sup> <sup>9</sup>Eerowa imatziro, aritaki riyota-nakiri aminaashi-waeta okaatzi rantziri, aritaki roshiya-kotee-yaari sheripiyari akenkithata-kotakiri.

<sup>10</sup> Rooma eeroka, pikimiteena naaka, okaatzi niyotaan-tziri, jempe nokinakaero, oeta nokoyiri, nokyaaryoo-wentanta, nentsikiro-wentanta, netakotanta, namawenita, <sup>11</sup>owatsinaa-waeteetakina, ikemaatsita-kaawaetee-takina, okimita okaatzi awiji-mota-kinari Antioquia-ki, Iconio-ki, eejatzi Listra-ki. Tema osheki ratsipeta-kaawenta-kinari. Roo kanteencha rookakaa-wenta-piintakina Awinkatharite. <sup>12</sup>Ari okantyaari, aritaki rowatsi-naaryaa-koeteeri ikaatzi rashiyitaari Jeepatzii-totaa-rewo Jesús kowanaa-tsiri ipinkatha-tajorentsita-nite. <sup>13</sup>Riima kaari-perori atziri-paeni, amatawitan-taniri eekiro imaperota-tyeeyaa, rashi-minthatyaawo ramatawitanta-piinte, imateetzi-tyaari rirori ramatawiteeteri. <sup>14</sup>Rooma eeroka, poejokirotyaawo okaatzi piyotakiri, okaatzi pawentaa-naari. Tema piyotzi iita yotaaki-mirori. <sup>15</sup>Ari petanakawo eeniro peentsitanaki piyota-koteero Tajorentsita-tsiri Jankina-rentsi. Ari opoñaari piyotee aritaki pawijako-shiretee aririka pawentahae-yaari Jeepatzii-totaa-rewo Jesús. <sup>16</sup>Tema maawoeni Jankina-rentsi-perori, riitakira Tajorentsi tajonka-shiryaan-takirori rojankinee-tanta-kawori. Rootaki ryotaan-teetari, rootaki ishintsi-theetantari ikaminaan-teete, rootaki itampatzikae-tantari, rootaki iñaantee-tantari okantya ikameetha-shiretan-teetyaari. <sup>17</sup>Ari iñeerori ikaatzi rashitaari Tajorentsi ryopero-shireteero rantayiteero okaatzi kameethata-tsiri.

### Pikenkithateero ñaantsi

**4** <sup>1</sup>Iroka okaatzi noshintsi-temiri pantero. Riyotzi Tajorentsi nokantzimiri, ryotzitawo eejatzi Awinkatharite Jesús Jeepatzii-totaa-rewo, itzimi amina-koteerini rantayitakiri maawoeni añaayita-tsiri, eejatzi ikaatzi kamayiteen-tsiri. Tema rootzimateentsi ikoñaatee ipinkatha-ritapae. <sup>2</sup>Pikemi nokantemi: Okowa-perotatyaa powetsikyaa okini pikenkithateero iñaani, teera apatziro pikenkithateero aririka okameethatzi-motemi, tema otzimathee pimatero eejatzi aririka pikowaenkata-kote. Aririka piyotaante, otzimathee pitampatzikatante, pishintsi-waantete pikaminaante, piñaa-shintsi-thatante, roo kanteencha

<sup>b</sup> **3.8** Ikenkishiryaa-koetziri Janes eejatzi Jambres sheripiyari irikapaeni, Apitantoni-jatzi irika. Tema paerani rookakaa-wentan-taariri Moisés isheninka-paeni Israel-paeni, irika sheripiyari-paeni roshiya-kowitzakari Moisés, riraa-ntsita-kaero nijaa, ikoñaata-kaayitaki eejatzi osheki mashero.

paamaeyaaaha pithaakyaa-wenta-piintziro-kari aririka pimayita-neero.

<sup>3</sup>Tema paata, eero ikowaetee ikemijanteetero tampatzikari piyotaantayitziri nimaeka, tema ari ipiyota-paakyaa itsipa ikaate yoteerini, ari raminaa-shwaetyaari riyotaantero ikowa-shiyitari rirori. <sup>4</sup>Rootaki opoñaan-tyaari ipiya-shiteetero ikemijanteetero ikenkithata-shheetari, rocae-tanakiro ikemijantee-tziro rooperota-tsiri. <sup>5</sup>Rooma eeroka, pikiyothanite, pamawetashi-yitee-yaawo awiji-motemini pinteneetyakaayitziro Kameethari Ñaantsi, otzimatyeera pimonkaatero okaate panteeniriri Awinkatharite.

<sup>6</sup>Tema naaka kimitaka rooteentsi nopeyakotyaa, noshiya-kotyaawo ijakoeta-piintziro imiriteetziri ratsipeta-kaeteniki Tajorentsi, aritaki jakotzi-matakaha imiriteetziri. <sup>7</sup>Nokyaaryoo-shire-piintaki, noshiyakaawitaka nomatakiro antawo nomankyaan-tapiinta. Okimiwitakawo eejatzi aritaki nomatakiro noyiishitantzi areetakina jempe oweyaa noshiyi. <sup>8</sup>Okimiwita-kawo riitakimi Awinkatharite owayita-kironi amathee-rentsi ipaeteeriri tampatzika-shireri-paeni. Tema Tampatzika-shireri rirori Awinkatharite, riitaki yotanta-paatsini kyaari-pero-rika ikameetha-shireteetzi, aripaetera ipapaenawo nashitari naaka. Teera apatziro naaka, ari ikimitaa-yiteeri ikaate kaari ojamanitatsini royaako-taari ipiye.

### Apaniroeni ikantee-tziri Timoteo

<sup>9</sup>Nokowa-pero-taki paminamate jempe pikantyaa pipokantyaari intsipaete nojeekira naaka. <sup>10</sup>Tema rookawenta-nakina Demas, okaema-shireteeri rirori jaawiki-jato. Jatee Tesalónica-ki. Riima Crescente ikinanakiro rirori Galacia-ki. Ari ikimitakari Tito ikinanaki rirori Dalmacia-ki. <sup>11</sup>Apatziro ikantakaawo Lucas riitaki jeekaneentsi apaniroeni itsipatana jaka. Rootaki nokowantari pipoki eeroka pitsipata-kyauri Marcos, aritaki imatakiro rirori ramitakotena. <sup>12</sup>Tema notyaanteeri Tíquico janta Efeso-ki. <sup>13</sup>Aririka pipokanaki eeroka, pamaenawo nowewiryakowo nookanakiri paerani nampsitsiki Troas ojeekira ipankoki Carpo. Nokoyi pamaenawo nojankina-yitani jeekatsiri janta. Riira nokowa-perotzi piyoshiiteri pamaenari nomashi-tsitsi nojankina-yitziri. <sup>14</sup>Riima Alejandro, eshiro-pakori riitaki oñaashirenkapinta-kinari, rowajankitahaa-tyeerira Awinkatharite. <sup>15</sup>Riijatzira paamaeyaaari eeroka, tema imaperotakiro rotzika-tzikatakiro okaatzi nokenkithata-koyitakiri, osheki ikijawenta-kinawo. <sup>16</sup>Tema owakira rahaetakina paerani naaka ijekira pinkatha-ri nokamanta-kotero okaatzi ikantakoe-takinari, tekatsira apaani tsipata-nakinani, ithonka ishiya-pithata-nakina. Roo kanteenchaa, tee nokoyiro naaka rowajankitaa-wenteeteri iroka. <sup>17</sup>Tema itsipa-shiretakina Nowinkatharite, riitaki ñaapero-shireta-kaakinari. Rootaki nomatan-takawori nokenkithata-kaeri

maawoeni, ari okanta ikemathatan-takinari kaari asheninkata. Rootakira rowawijaa-kotan-tanari Nowinkatharite rashiryahae-tenami, okimitawo rookaetziri apaani atziri manitzi-mooki royaari manitzi-paeni. <sup>18</sup>Riitaki Awinkatharite aminako-wenta-kinari kaari rowashironkae-tantana, eekiro riyata-kaatyeero roojatzi nareetan-teeyaari ipinkathari-wentantzira Inkite-jatzi. Ashi rowaero rirori rajahaa-wentee-teeyaari. Kyaariwé.

**Oweyanta-paakawori itajonka-wentan-teetzi eejatzi wethataantsi**

<sup>19</sup>Nokoyi powethatyaanari Prisca eejatzi Aquila, ari pikimitakiri Onesiforo, eejatzi ikaatzi jeeka-wankotziriri. <sup>20</sup>Riima Erasto, ari ijEEKapaaki rirori Corinto-ki. Riima Trófimo, naaka oakanakiriri Mileto-ki, imantsiya-waeta-paakitpii. <sup>21</sup>Otzimatyera piyaate intsipaete pareetan-tyaari nojeekira naaka tekira okyaawon-tsita-neeta. Tema ikaatzi akantayiteeri jaka “noyemijantzin-karite-paeni,” rowethatee-yimini. Irika ikaatzi wethatzimiri: Eubulo, Pudente, Lino eejatzi Claudia.

<sup>22</sup>Okantashitzimaetyaa ijEEKA-shiretan-teemi Awinkatharite Jesús Jeepatzii-totaa-rewo, ari ineshironkayiteemi. Kyaariwé